

ԼԻԱՆԱ ԱՎԵՏԻՍՅԱՆ,
ԿԱՐԵՆ ՀՈՎՀԱՆՆԻՍՅԱՆ
ՀԱԻ

ՆՈՐ ՃՈՒՂԱՅՈՒՄ ԳՐՎԱԾ ՆՈՐԱՅԱՅՏ ԱՎԵՏԱՐԱՆԸ

Թողովրդական սրբավայրերի մեջ իրենց ուրույն տեղն են գրավում սուրբ գրքերի պաշտամունքի հետ կապված ուխտատեղիները, որոնք ստեղծված են այդ գրքերի պահպանման եւ պաշտամունքի նպատակով: Հայոց մեջ սուրբ գրքերը հիմնականում ձեռագիր ու տպագիր ավետարաններ են, Ս. Գրիգոր Նարեկացու «Մատյան ողբերգություն» գիրքը եւ հմայիլներ: Ավելի հազվադեպ սուրբ գրքի դերում կարող է հանդես գալ «Ուրբաթագիրքը»¹: Պաշտամունքի առարկա հանդիսացող ավետարանները հաճախ ունենում են իրենց անունները՝ ըստ գտնվելու նախկին կամ ներկա վայրի (Ծուղրուլթի Ավետարան, Մուղնու Ավետարան, Շ(ու)րիչկանի Ավետարան)², կազմի գույնի (Կարմիր, Շեկ, Ոսկեկող)³, ծաղկազարդ, պատկերազարդ լինելու հանգամանքի (Ծաղիկ), հրաշալի հատկությունների (Մեռելհարույց, Սասման՝ «ցասման», աղետի, Խնդրակատար, Աստվածախառն), հրաշքով հայտնաբերման կամ ձեռքից ձեռք անցնելու պատմության (Քոչահան, Արծվաբեր, Թագավոր, Խուլ), որեւէ սրբի, որին նվիրված է սրբավայրը կամ որը հայտնվում է երազներում ու տեսիլքներում (Մայրիկ Ս. Աստվածածին, Վեհամոր, Ս. Դավիթ), տիրոջ (Վիշապկենց, Մարխաս, Բարսամենց) եւ այլն: Որոշ ավետարաններ կոչվել են նաեւ Թուխ Մանուկ, քանի որ պահպանվում էին Թուխ Մանուկ սրբավայրերում, հայտնվում էին հավատացյալների երազներում՝ անձնավորված եւ իրենց Թուխ Մանուկ կոչելով:

Սրբավայրի եւ դրա ստեղծման առիթը հանդիսացող սուրբ գրքի անունները սովորաբար նույնն են. գիրքն իր անունն է տալիս սրբավայ-

¹ Լ. Սիմոնյան, Հ. Հակոբյան, Կ. Հովհաննիսյան, Դաշտային ազգագրական նյութ (այսուհետ՝ ԴԱՆ), Արարատ, Ուրցաձոր, 2014:

² Տե՛ս Թ. Գեւորգյան, Շուրիչկանի ավետարանի գործառնությունը պարսկահայերի ավանդական կենցաղում, Հայոց սրբերը եւ սրբավայրերը, Երեւան, 2001, էջ 411-413:

³ Լ. Սիմոնյան, Կ. Հովհաննիսյան, ԴԱՆ, Արագածոտն, Ապարան, 2011:

րին, եւ դա վերաբերում է ոչ միայն փոքր մատուռներին, այլեւ եկեղեցիներին: Մասնավորապէս, Երեւանի Ս. Զորավոր Աստվածածին եկեղեցուն իր անունն է տվել այդտեղ տեղափոխված Զորավոր ավետարանը⁴: Որոշ դեպքերում, սակայն, երկու սուրբ գրքերի անունները կարող են համադրվել, օրինակ Գրիգոր Նարեկացի ավետարան⁵, կամ Նարեկ ավետարան: Քիչ չեն դեպքերը, երբ ավետարանը սրբավայրում չի գտնվում. առավել ցավալի դեպքերում դրանք առեւանգվել կամ վաճառվել են խնամողների ժառանգների կողմից, երբեմն դրանք հանձնված են լինում Մաշտոցի անվան Մատենադարանին կամ Էջմիածնի ձեռագրատանը, սակայն սրբավայրը չի կորցրել իր անունն ու ուխտավորին:

Սույն հոդվածում մենք կներկայացնենք նման մի սրբավայր ու դրա մեջ պահպանվող Ժէ. դարի ձեռագիր մի ավետարան: Հոդվածում բերված ամբողջ նյութը հիմնված է հեղինակների կողմից կատարված երկու ազգագրական գիտարշավների ընթացքում հավաքած տեղեկությունների վրա⁶: Այն դեպքերում, երբ քննարկվող նյութը վերաբերում է տվյալ սրբավայրին կամ Ավետարանին, համապատասխան հղում չի տրվում: Հաշվի առնելով Ավետարանի տերերի ցանկությունը՝ գտնման վայրը եւ բանասացների անունները չեն տրվում:

Ավետարանի հայտնաբերման պատմությունը եւ սրբավայրի հիմնադրումը

Բանասացի վկայություններ՝ իր ամուսնու պապը՝ Նելսոնը, Ի. դ. 30-ական թթ. ապրել է Արթիկի Ղըրխդագիրման (Հնաբերդ) գյուղում: Այրիանալուց հետո նա գնացել է ներկայիս գյուղը, ուր հայտնաբերվել է ավետարանը: Այստեղ Նելսոնը հանդիպել է Թագուհի անունով մի կնոջ, եւ, տեսնելով, որ ապրելու պայմաններն ավելի բարվոք են, որոշել է բնակվել այդ գյուղում: Նա եւ Թագուհին տուն չեն ունենում, վարձով են ապրում: Նելսոնը կնոջը թողնում է այդ տանը, իսկ ինքը գնում է Ղըրխդագիրման՝ իր իրերը բերելու: Այդ գիշեր կնոջ երազում սուրբը ասում է,

⁴ Ե. Շահազիզ, Հին Երեւանը, Երեւան, 2003, էջ 227: Նաեւ Ա. Հարությունյան, Ա. Սիմոնյան, Զորավոր Ավետարանը, Երեւան, 2016, էջ 16:

⁵ Լ. Սիմոնյան, Կ. Հովհաննիսյան, ԴԱՆ, Արագածոտն, Արագած, 2016:

⁶ Լ. Ավետիսյան, ԴԱՆ, Արագածոտն, 2015, Լ. Ավետիսյան, Կ. Հովհաննիսյան, ԴԱՆ, Արագածոտն, 2016: Հեղինակները խորին շնորհակալություն են հայտնում պ. գ. թ. Լիլիթ Սիմոնյանին եւ պ. գ. թ. Արսեն Հարությունյանին խորհուրդների եւ օժանդակության համար:

որ ինքը ավետարանն է. «Եկեք ինձ հողի տակից հանեք ու դարձրեք ձեզ տուն» (տան տեղում փլատակներ են լինում): Նելսոնը վերադառնում է, կնոջը չի գտնում: Հարեւաններն ասում են, որ Թագուհին գտնվում է վերելի թաղում: Երբ գտնում է կնոջը, վերջինս պատմում է երազը: Նրանք քանդում են երազում նշված վայրը եւ փլատակների տակից հանում մի տապանաքար, մոմլաթի կտորի մեջ փաթաթված սուրբ գիրք ու երկաթե խաչ: Այդ նույն տեղում մատուռ⁷ են կառուցում՝ մասունքները դնելով ներսում, իսկ կողքին՝ մի սենյակ, որտեղ իրենք են ապրում:

Բանասացի սկեսուրը պատմել է, որ ինքը տեսել է սրբին, ավելի ճիշտ՝ սրբերին: Նրանք ամուսիններ են եղել՝ չեկ մագերով, նրանց կողքին ուռնու ճյուղերից հյուսած մեծ կողովի մեջ զույգ ոսկեծամիկ երեսաներ են դրված եղել՝ ոտք ու գլուխ պառկած, ու կարծես կղզու վրա լինելին՝ չըջապատված ջրով: Բանասացը պատմում է նաեւ, որ երբ պառկում էին քնելու, ուժեղ դմբդմբոց էր գալիս: Իրենց թվացել է, թե տանիքին ինչոր կենդանի կա, սակայն սկեսուրն ասել էր, թե ձի է վազում տան մեջ, չվախենան:

Սրբին տեսել է նաեւ բանասացի ամուսինը. բանակ գնալու գիշերը նա խնջույքի ժամանակ անսովոր մրսել է ու մտել թոնրատուն՝ տաքանալու: Դուռը բացվել է, եւ ներս է մտել սպիտակ հագուստով մի ծերունի: Ամուսնու ասելով՝ ծերունին ծանոթ չէր: Նա ձեռքը դրել է նրա ուսին եւ ասել. «Վախենում ե՞ս», նա էլ թե՛ «Ձէ, ինչի՞ց պետք է վախենամ»: Ծերունին պատասխանել է. «Մի՛ վախեցիր, ամեն ինչ լավ կլինի», ու անսպասելի հեռացել է: Հետո ներս է մտել ամուսնու հորեղբայրը, եւ ամուսինը նրան հարցրել է. «Ո՞վ էր այդ ծերունին, որ նոր դուրս եկավ դռնով»: Հորեղբայրն էլ զարմացած պատասխանել է. «Երազ ես տեսե՞լ, ինչ է, այստեղ ոչ մեկը չի եղել»:

Սրբավայրի տեսքը

Ինչպես նշվեց, ներկայումս սրբավայրը գտնվում է բնակելի տան ետնամասում՝ թոնրատան կողքին: Այն փոքր սենյակ է՝ բետոնե հատակով, գաջապատ դեղնավուն պատերով: Սրբավայրը լուսավոր է՝ դիմացի մեծ լուսամուտի շնորհիվ: Դռնից դեպի ձախ՝ անմիջապես պատին հպված, երկու իրար կողքի դրված քարերի վրա տեղադրված է հողից հանված

⁷ Սրբավայրը մատուռ են անվանում գյուղացիները, բայց իրականում այն մատուռ չէ բառի ճարտարապետական իմաստով, այլ մի սենյակ է, որն ընկնում է տան ետնամասում՝ թոնրատան կողքը:

յուրահատուկ սեղանի ձեռով տապանաքարը՝ ծածկված սպիտակ շուշ-պաներով: Այն կարմրավուն քարից է՝ վրան մարդկային մարմնի գծա-պատկերով: Ներքեւի հատվածը ջարդված է, գլխամասում կան սպիտակ եւ կարմիր շուշպաներ, սակայն դրանք ծածկված են երկու սփռոցանման մեծ կարմիր խաչով սպիտակ շուշպաներով: Վրան դրված է ժամանա-կակից տպագրության Նոր Կտակարան, որի վրա գտնվում է ձեռագիր Սուրբ ավետարանը՝ առջեւում հողից հանված հինավուրց մետաղյա խա-չը: Ավետարանի ետեւում պատին հենված է Քրիստոսի գիպսե գունա-զարդ պատկերը: Սեղանի եւ կողքի պատերի պարանների վրա փռված են սպիտակ շուշպաներ՝ կարմիր խաչերով: Սեղանի դիմացի պատի առջեւ տեղադրված է մոմակալը: Պատերին հենած եւ կախված են շուրջ մեկ տասնյակ սրբանկարներ, որոնցից մի քանիսը ձեռագործ են:

Մատուռը բազմիցս վերանորոգել են, սակայն խոնավությունից պատի ծեփերը թափվում են: Քանի որ մատուռի մուտքը տանից է, տանտերե-րը որոշել են դրսի կողմից դուռ բացել, բայց վախեցել են՝ մտածելով, որ սրբին դուռ չի գա, եւ իրենց հետ դժբախտություններ կպատահեն:

Սրբավայրի հավատալիքներն ու գործառույթները

Բանասացի սկեսրայրը եւ նրա եղբայր Տաճատը մասնակցել են Հայրե-նական պատերազմին: Սկեսրայրը Ռոստովից վերադարձել է, իսկ Տաճատը մինչեւ Բեռլին է հասել: Պատերազմի ժամանակ Տաճատը «խաչի մեքենան է վարել» (բժշկական մեքենա), վիրավորներ տեղափոխել ու բազմիցս մա-հից փրկվել է, քանի որ իրենց սուրբը միշտ իր հետ է եղել:

Բանասացի սկեսուրը մեծ հավատքով կին է եղել եւ ծառայել է սրբա-վայրին: Եթե որեւէ մեկը բանակ գնալուց առաջ սրբավայր է եկել ու մոմ վառել, նա մատուռին նվիրաբերած ասեղնագործ թաշկինակներից (շուշ-պաններից) մի փոքրիկ կտոր է կտրել ու ամրացրել նրանց հագուստին: Եվ նրանք բոլորը ողջ-առողջ վերադարձել են, իսկ այդ փոքրիկ կտորը հետ են բերել մատուռ ու դրել փոքրիկ արկղի մեջ:

Վերը շարադրված տեսիլքը, որում սուրբը հույս է տալիս բանակ գնացող ամուսնուն, Տաճատի՝ սրբի կողմից պաշտպանվածութուն զգա-լը, բանասացի սկեսուրի ծեսը վկայում են, որ սրբավայրի գլխավոր գոր-ծառույթներից է գինվորների հովանավորությունը:

Բանասացը նաեւ պատմում էր, որ երբ կարկուտ էր գալիս, սկեսուրը վերցնում էր ավետարանն ու երկաթե խաչը, դուրս էր գալիս, եւ կար-կուտն անմիջապես դադարում էր: Այսպիսով, սրբավայրի մյուս գոր-

ծառույթն էր կարկուտ կտրելը, այսինքն՝ բերքի պաշտպանությունը: Ավետարանների ուժը հաճախ է նպաստում բերքի պահպանմանը կամ պտղաբերությանը: Օրինակ՝ նման մի գործառույթ ունի Արագածոտնի մարզի Սարալանջ գյուղի ավետարանը, որը բարձրաձայն ընթերցելուց անձրեւ է գալիս⁸:

Ավետարանի հետ կապված են այլ դեպքեր եւս: Հարեւաններից մեկը հիվանդանում է, եւ ընտանիքի անդամները խնդրում են ավետարանն իրենց տուն տանել՝ հիվանդին օգնելու նպատակով: Բանասացի սկեսուրը, ընդառաջելով խնդրանքին, տալիս է, սակայն վախենում է, եւ ամբողջ գիշեր չի կարողանում քնել: Երբ լույսը բացվում է, գնում, ետ է բերում գիրքը եւ այլեւս ոչ մեկին չի տալիս: Բանն այն է, որ այս տանը եղել է նաեւ էֆրեմերտե (Եփրեմ Վերդի), որը վերցրել են, սակայն չեն վերադարձրել:

Մի անգամ Գյումրիից մի աղջիկ է գալիս իր մոր հետ, ասում է, որ երազում տեսել է այս մատուռը: Երբ տանտերը ցանկացել է նրան ուղեկցել դեպի սրբավայրը, աղջիկն ասել է. «Մի՛ արի, ես տեղը գիտեմ», ու գնացել է դեպի մատուռը: Այդ աղջիկը այստեղ էր եկել բժշկվելու նպատակով:

Հետեւաբար, սրբավայրի գործառույթներից է նաեւ հիվանդների բժշկումը: Այս գործառույթն առհասարակ ամենատարածվածն է ժողովրդական սրբավայրերի դեպքում, այդ է պատճառը, որ մարդիկ դիմում են Ավետարանի օգնությանը, թեկուզեւ զրա տերերն իսկ չեն հաստատում Ավետարանի այդպիսի գործությունը:

Մատուռի մաքրությունը զբաղվում են թաղի չամուսնացած աղջիկները, ասեղնագործ շուշպաները լվանում են խմոր շաղելու տաշտի մեջ՝ առանց օճառի, ու չեն արդուկում: Այսինքն պետք է պահպանվի խստիվ անարատ մոտեցում. չամուսնացած աղջիկները, շուշպաները ամենասրբազան (հացի խմոր շաղելու տաշտը) ամանում լվանալը, օճառով լվանալու եւ արդուկելու արգելքը բազմապատկում եւ շեշտում են տեղի սրբազանությունը: Նշենք, որ այս անգիր կանոնը վերաբերում է նաեւ այլ սրբավայրերի շուշպաների խնամքին:

Ավետարանը

Ավետարանը 17×13×4 սմ մեծությամբ կաշեկազմ մատյան է՝ բաղկացած 302 թղթե թերթերից: Գրված է բոլորգրով, վիճակը բավարար է,

⁸ Լ. Սիմոնյան, ԴԱՆ, Արագածոտն, Սարալանջ, 2010:

տառերը եւ գույները լավ պահպանված են, թերթերին առկա են խոնավոթյան թեթեւակի հետքեր:

Տախտակե միջուկով կազմի դիմերեսին ամրացված է մետաղյա խաչ՝ ծայրերին կապույտ եւ կարմրավուն քարեր: Խաչի վերելի ձախ անկյունում ամրացված է մեկ այլ՝ ավելի փոքր ծաղկանման հավասարաթեւ խաչ: Կազմի կաշին դարչնագույն է, աջ կողմը մաշված եւ կտրտված: Ամենայն հավանականությամբ, կազմը հին է, գուցե ԺԸ.-ԺԹ. դդ.: Կազմի դարձերեսն ավելի լավ է պահպանվել, հարդարանքում առկա են երկու նախազարդ դրվագված շրջանակներ, որոնց կենտրոնում՝ գեղեցիկ հորինվածքով խաչ է նկարազարդված՝ վերին եւ ստորին հատվածներն ամփոփված մեծ եռանկյունիների մեջ:

Բովանդակություն

1. 1ա-82ա ավետարան ըստ Մատթեոսի
2. 82բ-136ա ավետարան ըստ Մարկոսի
3. 136բ-226ա ավետարան ըստ Ղուկասի
4. 227ա-294բ ավետարան ըստ Յովհաննու

Ձեռագիրն աչքի է ընկնում ոչ չքեղ նկարազարդմամբ: Պատկերված են չորս ավետարանիչները (Հովհաննես ավետարանչի պատկերը զգուշությամբ կտրած-հանած է, որի վկայությունն է այդ տեղում մնացած թղթի նեղ շերտը): Ավետարաններից յուրաքանչյուրն սկսվում է պատկերազարդ անվանաթերթով, առաջին նախադասությունները գրված են թռչնագրերով, գրեթե բոլոր թերթերին առկա են լուսանցազարդեր՝ ոճավորված ծառեր, թռչուններ, տաճարներ եւ այլն: Գլուխներն սկսվում են թռչնագրերով, առաջին տողը գրված է կարմիր թանաքով: Յուրաքանչյուր պարբերություն սկսվում է կարմիր եւ կապույտ սկզբնատառերով, բառերը գրված են միասին, երբեմն իրարից անջատ, առատորեն կիրառված են կրճատման, առոգանություն եւ կետադրական նշաններ: Գրությունը երկայուն է՝ սահմանագծված կարմիր թանաքով: Մատթեոսի, Մարկոսի եւ Ղուկասի ավետարանները ավարտվում են ընդմիջարկումով, օրինակ՝ Մատթեոսի ավետարանն ավարտվում է այսպես. «Ավետարանն ըստ Մատթեոսի: Նախադրութիւն»: Մարկոսի Աւետարանչին»: Դրանից հետո ներկայացված են յուրաքանչյուր ավետարանչի ով լինելը եւ տվյալ ավետարանի բովանդակությունն ըստ գլուխների, որից հետո համաբարբառ խորանները՝ տրված աղյուսակի ձևով:

Ավետարանն սկսվում է Մատթեոսի մանրանկարով՝ էջ 1ա (նկ. 1), որին հաջորդում է անվանաթերթը: Կիսախորանի եւ առաջին տողի արանքում



Նկ. 1. Մատթեոս ավետարանիչ, թերթ 1ա



Նկ. 2. Ս. Ավետարանի կազմը դիմացից



Նկ. 3. Մարկոս ավետարանիչ, թերթ 82բ



Նկ. 4. Ղուկաս ավետարանիչ, թերթ 136բ

ավելացված է. «ս[ր]բ[ոյ] աւետարանի ըստ Մատթէոսի»⁹: Ավետարանի մի քանի էջերում կան հատուկ նշումներ, որոնք, հավանաբար, կապված են ավետարանի գործնական կիրառութեան հետ եւ ընգծում են ընթերցվածների տեղը¹⁰:

Մարկոսի ավետարանն սկսվում է 82բ էջից, որտեղ գետեղված է Մարկոսի մանրանկարը (նկ. 2): Հաջորդ՝ 83ա էջին Մարկոսի ավետարանի անվանաթերթն է: Մարկոսի ավետարանի սկզբնատողի մի մասը գրված է թռչնագիր, իսկ Ս գլխատառը կենդանագիր է՝ ուղղահայաց զույգ ստեղներն արտահայտված են Մարկոսին խորհրդանշող առյուծների տեսքով, որոնք իրենց թաթերում ջահ են բռնել: Հաջորդ տողը («որպէս եւ գրեալ է Եսայի մարգարէ»¹¹) գրված է կարմիր թանաքով, մնացածը շարունակվում է սև թանաքով: Թերթի ներքեւում ավելացված է. «ս[ր]բոյ աւետարանի Յ[իսու]սի Ք[րիստո]սի որ ըստ Մարկոսի» տողը: Այստեղ եւս կան հատուկ նշումներ՝ այլ ձեռագրով:

Ղուկասի ավետարանը սկսվում է 136բ. էջից, ուր գետեղված է ավետարանչի մանրանկարը (նկ. 3)¹²: Հաջորդ՝ 137ա էջին անվանաթերթն է: Ավետարանի սկզբնատողի առաջին բառը գրված է թռչնատառ, իսկ գլխատառ Ք-ն արտահայտված է ավետարանչին խորհրդանշող կապույտ եղան եւ թռչնի համադրութեամբ: Այս ավետարանում նույնպէս կան հատուկ նշումներ:

Հովհաննեսի ավետարանը պետք է սկսեր 226 էջից, սակայն ավետարանչի մանրանկարը կտրած-հանած է: 227ա էջին Հովհաննեսի ավետարանի անվանաթերթն է: Սկզբնատողի առաջին մասը գրված է թռչնատառ, իսկ գլխատառ Ի-ն՝ կապույտ եւ կարմիր թռչունների համադրութեամբ: Քանի որ Հովհաննես ավետարանչի խորհրդանշանը արծիվն է, գուցե այս թռչունները արծիվներ են, սակայն այստեղ առկա է որոշակի վնասվածք, ինչի պատճառով հնարավոր չէ հստակ որոշել թռչունների

⁹ Համեմատելով այս տողի ձեռագիրն ավետարանի երկրորդ հիշատակարանի ձեռագրի հետ, հանգեցինք այն եզրակացության, որ այս տողն ավելացրել է երկրորդ հիշատակարանի գրող Տեր Ներսեսը:

¹⁰ Հավանաբար այս նշումները եւս պատկանում են Տեր Ներսեսին:

¹¹ Մեր ձեռքի տակ եղած Նոր կտակարաններում այս տողն այլ կերպ է. «Որպէս եւ գրեալ է ի մարգարէս»:

¹² Ղուկաս ավետարանիչը նկարված է Մատթեոս եւ Մարկոս ավետարանիչների մանրանկարների որոշակի համադրմամբ՝ Ղուկասի դիրքը նման է Մատթեոսին, բացառությամբ գլխի թեքվածության, իսկ սենյակի ներքին հարդարանքը նման է Մարկոսի մանրանկարի հարդարանքին:

տեսակը: Այս ավետարանում եւս կան հատուկ նշումներ:

Ավետարանիչների լուսապսակները ոսկով են արված եղել, որը մասամբ թափվել է:

Ավետարանը հարուստ է լուսանցազարդերով, որոնցից մի քանիսն ունեն խորհրդաբանական իմաստ¹³. ծառի, տաճարի, լուսապսակով տղամարդու կամ կնոջ պատկերները նկարված են համապատասխան հատվածներում. դրանով ծաղկողը ցանկացել է հաղորդել տվյալ հատվածի բովանդակությունը: Այսպես, Մատթեոսի ավետարանի ԻԱ. 19-21 հատվածում պատկերված է մի ոճավորված թղթի՝ ականարկելով թղթնու առակը: Նույն ավետարանի (Մատթ. ԻԲ. 39, ԻԳ. 1) մեկ այլ թերթին պատկերված է ոճավորված տաճար. այստեղ Քրիստոս կանխատեսում է Տաճարի եւ Երուսաղեմի կործանումը: Ղուկասի ավետարանի ԺԹ. 45-46 հատվածում նույնպես ոճավորված տաճար է պատկերված, որն ականարկում է տաճարից վաճառականների վտարումը:

Չորս ավետարանների այն հատվածներում, ուր խոսքը Քրիստոսին խաչից իջեցնելու մասին է (Մատթ. ԻԷ. 57-61, Մարկ. ԺԵ. 43-47, Ղուկ. 50-54, Հովհ. 38-41), լուսանցքներում պատկերված է լուսապսակով Հովսեփ Արիմաթացին (այս դեպքերում էլ լուսապսակներն արվել են ոսկով, բայց այն թափվել է): Առաջին երեք դեպքերում պատկերված է միայն Հովսեփ Արիմաթացին, սակայն Հովհաննեսի ավետարանի համապատասխան տեղում իրար դեմ դիմաց՝ տարբեր թերթերին պատկերված են Հովսեփ Արիմաթացին ու Մարիամ Մագդաղենացին (287ա): Հովհաննեսի ավետարանում Քրիստոսին խաչից իջեցնելու դրվագին անմիջապես հաջորդում է Մագդաղենացու այցը Քրիստոսի գերեզմանին կիրակի օրը՝ աղջամուղջին եւ Քրիստոսի գերեզմանը դատարկ հայտնաբերելը (Հովհ. Ի. 1-3), ուստի այստեղ Մագդաղենացուն պատկերելով՝ հենց այդ սյուժեին է ցույց տվել սույն ավետարանի ծաղկողը:

Գրչուկյան հիշատակարանում ծաղկողի անունը նշված չէ, ինչպես եւ գրիչը չի նշել իր անունը: Ավետարանիչների մանրանկարները ոճական առումով բավականին տարբերվում են լուսանցազարդերից: Մանրանկարները կատարված են հմուտ ձեռքով՝ ծավալների, դիմագծերի եւ ձեռքերի նրբին արտահայտություն, իսկ լուսանցազարդերն ավելի

¹³ Ինչպես նշում է Ս. Տեր-Ներսեսյանը, մի շարք պատկերային մոտիվներ, որոնք առաջին հայացքից կարող են զարդեր թվալ, իրականում կապված են տեքստի որոշակի հատվածի բովանդակության հետ, ինչպես ծառերը, խաչերը, փոքրիկ տաճարները, տես **Ս. Տեր-Ներսեսյան**, Էջմիածնի ավետարանի սկզբի թերթերի մանրանկարների թվականը, Հայ արվեստը միջնադարում, Երեւան, 1975, էջ 33:

սխեմատիկ են, գծանկարային: Հետեւաբար, հնարավոր է, որ մանրանկարներն ու լուսանցազարդերը տարբեր ծաղկողների են պատկանում: Դատելով ավետարանիչների հելլենական զգեստներից՝ մանրանկարների ծաղկողը, հավանաբար, օգտվել է ավելի հին օրինակից:

Ավետարանն ունի երեք հիշատակարան, որոնցից առաջինը գրված է գրչի կողմից Հովհաննեսի ավետարանի վերջում¹⁴, էջ 294բ-299բ: Մինչ բուն հիշատակարանին անցնելը, գրիչը հակիրճ ներկայացրել է Հայ Առաքելական Եկեղեցու դավանաբանությունը: Այդ մասը արձակ է գրված, իսկ ահա բուն հիշատակարանը գրված է չափածո:

Հիշատակարանի չափածո հատվածի սկզբում հակիրճ ներկայացվում է Նոր Կտակարանը: Դրանից հետո նշվում է պատվիրատուն՝ համեստ տղա՝ երիտասարդ եւ ցանկալի, ճարտար եւ ազնիվ, հեզ եւ հույժ խելոք բազրգան (վաճառական) խաչատուրը: Նրա ծնողներն են Բաբենն ու Մարիամը, եղբայրն է Սարհատը, իսկ մյուս եղբայր Փարհատը երիտասարդ հասակում մահացել է: Ցանկանում է, որ նրանք արժանի լինեն արքայությանը, երբ փչի գաբրիելական փողը (այսինքն Ահեղ դատաստանի ժամանակ): Խաչատուրը «խիստ աննման» գործ է արել, որ գրել է տվել ավետարանը՝ Աստծո Շունչն ու Բանը: Կրկին հետեւում է խաչատուրի գովքը, ով այս պատվերի համար շնորհ ստացավ՝ զավակ ունեցավ: Գրիչը ցանկանում է, որ խաչատուրի ծնողները՝ մուհղուսի (մահտեսի) Բաբեն եւ Մարիամը, եղբայրներ Սարհատն ու Փարհատը լինեն Քրիստոսի աջ կողմում՝ Ուռնայի կալում: Ահեղ դատաստանի ժամանակ Քրիստոսի աջ կողմում՝ արեւելքում, գտնվելը նշանակում է, որ նրանք արդար են: Հետո թվարկում է պատվիրատու խաչատուրի քույրերին՝ Ամրգատե, Շուշան, Ասլգատե, Սինան ու եղբորը՝ Փանոսին, նրա փոքր որդի Գրիգորին՝ նորաբողոք եւ սիրելի: Առկա է գրչության թվականը՝ Ի. (20) հոբելյան, 2Ը. (88) վրան ավելացրած ամիսն ու ամսաթիվը՝ մայիսի 15-ին: Ավետարանը գրվել է Նոր Զուղայում: Սրանից հետո գրիչը տալիս է թեմակալ առաջնորդի անունը՝ Տեր խաչատուր՝ խաչատուր Կեսարացին: Գրիչը Կեսարացուն անվանում է շատ շնորհալի, հոետոր՝ հայերի մեջ հռչակված: Որպես Նոր Զուղայի Հայոց իշխան՝ հիշատակում է Վաթանի որդի Սարգուհին: Հետո հերթով թվարկում է եկեղեցու քահանաներին, որոնց հետաքրքիր բնութագրումներ է տալիս: Տեր Մարգարեն քաջ էր, խելքը ճարտար, ժրաջան: Տեր Սարգիսը «ահարկաճայն» էր, շնորհալի երաժիշտ:

¹⁴ Աջ լուսանցքում կարմիր, կապույտ եւ կանաչ գույներով բույսի եւ թռչնի համադրությամբ զարդանախշ:

Տեր Գրիգորը ծեր իմաստունն էր: Տեր Մխիթարը իր անվան նման հեղ էր, խոնարհ եւ փափկաձայն: Տեր Սիմոնը նոտարն էր, որ հետո դարձավ բազրդաւ (առեւտրական): Տեր Պետրոսի մականունն էր Փահլեւան (ուժեղ), որ Հնդկաստանից էր: Տեր Ասատուրը տասը գետ ունէր (գուցե տաս հյուսիս) եւ հմուտ ձկնորս էր: Տեր Կարապետը գիրք կազմող էր եւ սուլյն Ավետարանի գրչի նման Անգեղոսից էր: Տեր Թումանը Սպահան էր եկել հայրենի Վանից՝ ազահուլթյունից դրդված: Վերջում սովորութեան համաձայն գրիչը նսեմացնում է ինքն իրեն՝ միտքը կույր է, ձեռքն անբան, մարմինը՝ տկար, նա ունայն տրուփ է¹⁵, եղկելի եւ անբան, թեեւ քահանա է, բայց ավելի անարգ է, քան աշխարհիկները: Հետաքրքիր է, որ այստեղ նաեւ արտացոլված է այն երեւույթը, որ քահանան ավելի հարգված է, քան աշխարհականը: Սակայն գրիչը, զարմանալիորեն, չի նշում իր իսկ անունը:

Գրչութեան հիշատակարանից հետո, մյուս թերթին գրված է. «Արեւցաւ Աւետարանս ի թւին Տեռն փրկչին 1608 թ.»։ Ձեռք կարող ասել, թե ով եւ երբ է սա գրել: Սակայն այստեղ ակնհայտ սխալ է գրված «Տեռն» բառը, որ պետք է լինէր «Տեառն»։ Հաշվի առնելով այս գրվածքի՝ ժամանակակից գրիչով արված լինելը, այն պետք է որ գրված լինի ոչ վաղ անցյալում: Հավանաբար այս գրվածքի հեղինակը գրչութեան հիշատակարանում նշված թվականի Զ-ն շփոթել է Ծ-ի հետ եւ նրա հաշվումներում 1639 թ. դարձել է 1608 թ.:

Այս թերթի մյուս երեսից սկսվում է հիշատակարանը, որը գրել է Տեր Ներսեսը: Նա խնդրում է հիշել իրեն, իր կողակից Գուլվարդին, ծնողներ Ավետիսին եւ Քրիշմիչին: Քահանա Ներսեսը Ավետարանը գնել է իր արդար վաստակով: Խնդրում է աղոթքներում հիշել Տեր Ավետիսին (այսինքն նրա հայր Ավետիսն էլ է եղել քահանա) եւ Քրիշմիչին, մեծ պարոն Ներսեսին (հավանաբար սա նույնպես ինքն է՝ Տեր Ներսեսը կամ գուցե իր պապը) եւ իր գերդաստանի մնացած բոլոր անդամներին՝ անուն առ անուն: Վերջում տալիս է ավետարանի գնման թվականը՝ 1788 թ.:

Ավետարանի մեջ առկա հատուկ նշումները, հավանաբար, պատկանում են երկրորդ հիշատակարանը գրող Տեր Ներսեսին, քանի որ դրանք ձեռագրով տարբեր են ավետարանի տեքստի ձեռագրից: Լինելով քահանա՝ նա այս ավետարանն օգտագործել է իր աշխատանքի մեջ եւ նշում-ցուցիչներ արել համապատասխան տեղերում:

¹⁵ Տրուպ՝ հետնագույն, նվաստ, փոքր, տես՝ ՆՀԲ, հ. Բ., էջ 898:

Ավետարանի վերջին թերթին կա եւս մեկ հիշատակարան՝ գրված 1906 թ. փետրվարի 14-ին: Հիշատակարանի մեջ նշված է Փայաջուկ¹⁶ գյուղը, հավանաբար, ավետարանի նախկին տերը, մահտեսի Ավետիքի տան Ահարոնը, եղել է փայաջուկցի:

Հիշատակարանն ավարտվում է գրչի ստորագրությամբ:

Հավանաբար, Փայաջուկի Ս. Գեորգ եկեղեցու (կառուցվել է 1751 թ.) տանիքը փլուզվել է՝ տակը թողնելով ավելի քան 100 մարդու, այդ թվում՝ ավետարանի տիրոջ ընտանիքի անդամներին: Այդ իրադարձությունը կարող էր դառնալ ընտանիքի մնացյալ անդամների գաղթելու պատճառը:

Այսպիսով, այս սրբավայրի սրբազան առարկաներն են հողից հանած տապանաքարը, մետաղյա խաչն ու ավետարանը: Ավետարանը գրվել է 1639 թ. Նոր Զուղայում՝ անհայտ գրչի կողմից (գրիչն իր անունը չի նշել), անցի վաճառական խաչատուրի պատվերով: Հետագայում այն գնել է երկրորդ հիշատակարանը գրող Տեր Ներսեսը 1788 թ., ով այն օգտագործել է ծիսական նպատակներով: Մինչև հողի տակ թաղելը (առնվազն 1906 թ.) ավետարանը եղել է Սալմաստի Փայաջուկ գյուղում, որտեղից էլ այն բերել են ներկայիս գտնվելու վայրը: Հայաստանում խորհրդային կարգեր հաստատվելուց հետո, հավանաբար, պատիժներից եւ աքսորից խուսափելու համար ավետարանը թաղել են հողի տակ: Ի. դարի 30-ականների վերջում այն երազով գտել են եւ մինչ օրս պահպանում են այդ վայրում:

Սրբավայրի սրբին տեսել են շեկ մամուսիներն տեսքով, որոնք իրենց մոտ ունեցել են կողովի մեջ դրված երկու ոսկեծամիկ մանուկներ՝ քույր եւ եղբայր: Սուրբը հայտնվել է նաեւ ծերունու կերպարով: Սրբավայրի հիմնական գործառույթներն են զինվորների պաշտպանությունը, կարկուտ կտրելը՝ պողաբերությունը նպաստելը, բերքի պահպանությունը, հիվանդությունների բժշկումը:

Սրբավայրի տարածքը պետք է միշտ մաքուր լինի: Այն մաքրում են միայն կույս աղջիկները: Շուշպաները նույնպես լվանում են միայն կույս աղջիկները՝ հացի համար խմոր հունցելու տաշտի մեջ, առանց օճառի: Դրանք չի կարելի արդուկել. այս ամենը կրկնապատկում է սրբավայրի սրբազանությունը:

¹⁶ Փայաճուկ-Փայաջուկ՝ գյուղ Պարսկահայաստանում, Սալմաստ գավառում, տե՛ս ՀՀՏԲ, հ. 5, էջ 228:

РЕЗЮМЕ

Среди народных христианских святынь особое место занимают святыни, связанные с почитанием священных книг. Подобное святилище было исследовано недавно авторами этой статьи, где хранится Евангелие, написанное в 1639 г., в Новой Джуге, по заказу купца Хачатура. В Евангелии есть миниатюры-портреты трех евангелистов (портрет евангелиста Иоанна срезан) и множество орнаментов на полях. Святыня представляет из себя комнату в задней части жилого дома. Основными священными объектами являются могильная плита, выкопанная из земли, металлический крест и само Евангелие, найденные вместе в земле. Персонафицированного святого данного святилища люди видели в образе светловолосой семейной пары с двумя детьми – мальчиком и девочкой – в корзине. Святой являлся также в образе старика. Основные функции святилища – покровительство солдатам, прекращение града, обеспечение плодородия и урожая, излечение от болезней.

SUMMARY

Among the popular Christian sanctuaries, a special place is occupied by sanctuaries associated with the veneration of sacred books. Such a sanctuary has been recently investigated by the authors of this article, where one can find a Gospel, written in 1639 in New Julfa, by the order of merchant Khachatur. There are miniatures-portraits of three evangelists (the portrait of John the Evangelist is cut off) and many ornaments in margins in the Gospel. The sanctuary is identified as a room in the backside of an apartment building. The main sacred objects are a tombstone, dug out of the earth, a metal cross and the Gospel itself found together in the ground.

People used to consider the image of a blond-haired couple with two children - a boy and a girl - in a basket as the personified saint of the sanctuary. The saint was also seen in the image of an old man. The main functions of the sanctuary are patronage of soldiers, cessation of hail, assurance of fertility and harvest, cure for diseases.

